

आकाशवाणीखबरां

1. भारत नै प्रधानमंत्री नरेंद्र मोदी ते रूस दे राष्ट्रपति व्लादिमीर पुतिन हुंदे बश्कार कथित फोन पर होई दी गल्लबात दे बारे च नाटो महासचिव मार्क रूट दे बयान गी तथात्मक रूप कन्नै गलत ते पूरी चाल्ली निराधार दस्सेआ।
2. प्रधानमंत्री नरेंद्र मोदी होरें बिहार च मुख्यमंत्री महिला रोजगार योजना दा कीता शुभारम्भ ते आखेआ जे उंदी सरकार आसेआ शुरू कीती गेदी बक्ख-बक्ख महिला केंद्रित योजना ते कार्यक्रमें समाज दे हर तबके गी लाहू पुजाया।
3. देश दे 6 दाहके दी सेवा दे बाद भारती वायु सेना नै मिग-21 विमान गी दित्ती विदाई, रक्षा मंत्री राजनाथ सिंह होरें 1971 दे भारत-पाकिस्तान युद्ध च मिग-21 दी भूमिका दी सराहना कीती।
4. राष्ट्रपति द्रौपदी मुर्मू होरें नमीं दिल्ली च अज्ज प्रतिष्ठित राष्ट्री भूविज्ञान पुरस्कार प्रदान कीते।
5. अमरीका दे राष्ट्रपति डोनाल्ड ट्रम्प होरें आखेआ जे ओहू इज्राइल गी वेस्ट बैंक पर कब्जा नेई करन देगा।
6. एशिया कप क्रिकेट च अखीरी सुपर फोर मैच अज्ज संझा लै भारत दा मुकाबला श्रीलंका कन्नै होगा।

<><><><><><>

MEA-Briefing

भारत नै प्रधानमंत्री नरेंद्र मोदी ते रूस दे राष्ट्रपति व्लादिमीर पुतिन बश्कार कथित फोन उप्पर होई दी गल्लबात दे बारे च नाटो महासचिव मार्क रूट दे बयान गी तथात्मक रूप ने गलत ते पूरी चाल्ली निराधार दस्सेआ। नमी दिल्ली च इक मीडिया ब्रीफिंग दरान नाटो महासचिव दे बयान पर इक सवाल दे परते च विदेश मंत्रालय दे प्रवक्ता रणधीर जयसवाल होरें आखेआ जे नेई कोई गल्लबात नेई होई ऐं उनें अगगे आखेआ जे भारत नाटो जनेई महत्वपूर्ण संस्थान दे नेतृत्व थमां मेद करदा ऐ जे ओहू अपने सार्वजनिक बयानें च मती जिम्मेदारी ते सटीकता बरतन।

<><><><><><>

PM-Mahila Rozgar

प्रधानमंत्री नरेंद्र मोदी होरें अज्ज आखेआ ऐ जे उंदी सरकार नै महिलाएं गी ध्यानै च रक्खियै कई योजनां ते कार्यक्रम शुरू कीते न जिस राएं समाज दे हर वर्ग गी लाहू होआ ऐ। बिहार लेई मुख्यमंत्री महिला रोजगार योजना दे शुभारम्भ दे मौके नमी दिल्ली थमां वीडियो कांफ्रेंसिंग राएं बोलदे होई प्रधानमंत्री होरें आखेआ जे केंद्र दी डबल इंजन सरकार ते बिहार दे मुख्यमंत्री नितिश कुमार हुंदी सरकार रलियै महिलाएं दे कल्याण लेई कम्म करा'रदी ऐ। प्रधानमंत्री होरें आखेआ जे एहदी नीहू 11 बरे पैहले प्रधानमंत्री जन धन योजना राएं रक्खी गई ही जिस करी महिलाएं दे लक्खें बैंक खाते खुल्ली सकन। मुख्यमंत्री महिला रोजगार योजना गी नवरात्र दा उपहार दस्सदे होई प्रधानमंत्री होरें विश्वास जताया जे डबल इंजन सरकार दे प्रयासें राएं बिहार च लखउपति दीदीएं दी गिनतरी सब्बने शा बद्द होगा। उनें नवरात्रि दे पैहले दिन थमां जीएसटी दरें च कीती गेदी कटौती दा बी जिक्र करदे होई आखेआ जे इस कन्नै महिला ते गृहणियें गी घरेलू बजट संतुलित करने च मदद थहोग कीजे रोजमर्रा दी जरूरतें आहली चीजें दी कीमतां घट्ट होई गेइयां न। वीडियो कांफ्रेंसिंग राएं प्रधानमंत्री होरें बिहार दे पूर्णिया, गया, ते भोजपुर जिलें दी मुख्यमंत्री महिला रोजगार योजना दी लाभार्थियें कन्नै बी गल्लबात कीती।

<><><><><><>

MIG- 21 Farewell

देश दी 6 दाहकें दी सेवा दे बाद भारती वायु सेना दे दिग्गज लड़ाकू विमान मिग-21 गी अज्ज अखीरी विदाई दित्ती गई। एह विदाई समारोह चंडीगढ़ एयरबेस पर रक्षामंत्री राजनाथ सिंह, चीफ ऑफ डिफेंस स्टाफ जनरल अनिल चौहानख् वायु सेना प्रमुख एयर मार्शल ए.पी सिंह ते होरनें मानजोग व्यक्तियों दी मौजूदगी च आयोजित कीता गेआ। मिग 21 दा संचालन इक औपचारिक फ्लाईपोस्ट कन्नै सम्पन्न होआ। एयर चीफ मार्शल ए.पी सिंह होरें बादल-3 ना दे स्कार्डन दी अखीरी डुआरी भरी। इस मौके पर श्री सिंह होरें 971 दे भारत-पाकिस्तान युद्ध मिग-21 दी भूमिका दी सराहना करदे होई आखेआ जे ऐसे कई मौके आए नजिसले मिग-21 नै अपनी निर्णायक क्षमता साबित कीती ऐ। उनें आखेआ जे मिग-21 राश्ट्री गौरव ऐ ते एहदी सब्बने शा विशिष्ट विशेषता एहदी बहुमुखी प्रतिभा ऐ। चीन-भारत युद्ध दे बाद 1963 च भारतीय वायु सेना च शामिल कीता गेआ मिग-21 देश दा पैहला सुपरसोनिक लड़ाकू विमान हा। इस विमान नै 1965 ते 1971 दे भारत-पाकिस्तान युद्धें च निर्णायक भूमिका निभाई ही।

<><><><><><>

Prez. Murmu eo Science Award

राश्ट्रपति द्रौपदी मुर्मू होरें अज्ज नमीं दिल्ली स्थित राश्ट्रपति भवन दे सांस्कृतिक केंद्र च प्रतिष्ठित राश्ट्री भूविज्ञान पुरस्कार 2024 प्रदान कीते। राश्ट्री भूविज्ञान पुरस्कार भूविज्ञान दे खेत्तर च देश दे सब्बने शा पराने ते प्रतिष्ठित सम्मानें चा इक ऐ। पुरस्कार जेत्तुएं गी बधाई दिंदे होई राश्ट्रपति होरें आखेआ जे एह पुरस्कार भूविज्ञान दे खेत्तर च उंदी प्रतिष्ठिता, नवाचार ते उत्कृष्टता गी सम्मानित करने लेई दित्ते जंदे ना। राश्ट्रपति मुर्मू होरें आखेआ जे खनिजें मानव सभ्यता दे विकास च महत्वपूर्ण भूमिका निभाई ऐ ते उद्योगें दी नीहू रक्खी गई ऐ। उनें आखेआ जे कोयले ते लोहे दे बिजन औद्योगिकीकरण दी कल्पना नेई कीती जाई सकदी।

<><><><><><>

GST-Reforms Stationery

आम लोकें ते विद्यार्थियों गी इक बड़ी राहत दिंदे होई सरकार नै बक्ख-बक्ख उत्पादें पर जीएसटी घट्ट करियै उंदा बोझ घट्ट कीता ऐ। अगली पीढ़ी दे जीएसटी सुधारें तैहत स्टेशनरी दिआं चीजां जिआं जे कॉपी, ग्राफ बुक, शार्पनर, पेंसिल, रबड़, बगैरा गी टैक्समुक्त बनाई दित्ता गेआ ऐ। इसै चाल्ली बूट ते चप्पलें दी कीमतें च बी कमी कीती गई ऐ। एहदे कन्नै गै सरकार नै लकड़ी, पत्थर ते धातुएं कन्नै बनी दी मूर्तियों पर टैक्स दी दर गी घट्ट करियै 5 फीसद करी दित्ता ऐ जेड़ा पैहले 12 फीसद आहली स्लैब दा हिस्सा हा। मकामी लोकें सरकार दे इस फैसले दा सोआगत कीता ऐ।

<><><><><><>

Jitendra CSIR

विज्ञान ते प्रौद्योगिकी मंत्री डॉ. जितेंद्र सिंह होरें आखेआ जे पिछले 11 बरें च भारत नै टेकनालजी दे क्षेत्र च बेहतर कारकदगी दस्सी ऐ ते भारत इक टेकनालजी संचालित राश्ट्र बनी गेआ ऐ। नमीं दिल्ली च वैज्ञानिक ते औद्योगिक अनुसंधान परिषद CSIR दे 84में स्थापना दिवस समारोह गी संबोधित करदे होई आखेआ जे 2047 तगर विकसित भारत दे लक्ष्य गी हासल करने च तकनीक दी अहम भूमिका होग। इस मौके पर मंत्री होरें CSIR दी उपलब्धियों दी सराहना बी कीती जिंदे च मुलुखे दी पैहली एंटीबायोटिक Najithromycin बनाना ते पैरासिटामोल बनाने आस्तै स्वदेशी टेकनालजी गी विकसित करना शामिल ऐ।

<><><><><><>

Seva Parv Internet Rev

मुख्य भरै च “सेवा पर्व” मनाया जा रदा ऐ। एहदे तैहत प्रधानमंत्री नरेन्द्र मोदी हुंदी अगुआई आहली सरकार तैहत कीते जा रदे जत्तें गी उजागर कीता जा रदा ऐ। इस श्रृंखला च अज्ज अस गल्ल करगे Internet राएं आए दे क्रांतिकारी बदलाव दी। कियों इंटरनेट नै ग्रामीण भारत ते भारत नैट परियोजना राएं लोकें दी जिन्दगी च बड्डा बदलाव आन्दा ऐ। 2 लक्ख 18 हजार ग्राम पंचैतें च 7 लक्ख किलोमीटर Optical Fiber Cable बछ्छाईं गेई ऐ। प्रधानमंत्री नरेन्द्र मोदी हुंदे जत्तें राएं ग्राएं च इंटरनेट दा खासा विस्तार होआ ऐ। ग्रामीण इलाकें च रौहने आहले लोकें गी e-governance, सेहत सरबन्धी, दिक्खभाल, शिक्षा वगैरा दी सुविधा हासिल होई। इनें कम्में कन्नै डिजिटल भारत आहले जत्ते गी सेई मायनं च बल थोग।

<><><><><><>

US-Prez Israel

अमरीका दे राष्ट्रपति डोनल्ड ट्रम्प होरें आखेआ जे ओहू इज्राइल गी वेस्ट बैंक पर कब्जा नेई करने देडन। ट्रम्प होरें एहू बयान इज्राइल दे प्रधानमंत्री बेंजामिन नेतन्याहू हुंदे अज्ज न्यूयार्क च संयुक्त राष्ट्र महासभा च संबोधन लेई अमरीका औने कोला पैहले दिता। बक्ख-बक्ख देशें आसेआ फिलीस्तीन गी औपचारिक रूप कन्नै मान्यता देने दे बाद संयुक्त राष्ट्र महासभा दे हाल दे सम्मेलन च तनाव बदी गेआ ऐ। ट्रम्प हुंदे बयान करी इज्राइल सरकार हैरान ऐ। इज्राइल नै बार-बार आखेआ जे फिलीस्तीन गी मान्यता देने कन्नै औदे इरादे पर कोई असर नेई पोग।

<><><><><><>

PM-Tributes

प्रधानमंत्री नरेन्द्र मोदी होरें साबका प्रधानमंत्री डॉ. मनमोहन सिंह हुंदी जयंती पर उनेंगी श्रद्धांजलि अर्पित कीती। सोशल मीडिया पोस्ट च श्री मोदी होरें राष्ट्र निर्माण च उन्दे योगदान गी चेत्ता कीता।

<><><><><><>

CPSU

कोयला मंत्रालय तैहत औने आहले सार्वजनिक क्षेत्र दे कोयला उपक्रमें अज्ज अपने गैर कार्यकारी कर्मचारियें लेई 1 लक्ख 3 ज्हार रपे दे प्रदर्शन आधारित पुरस्कार पी.एल.आर दी घोषणा कीती। मंत्रालय मताबक इस पीएलआर कन्नै कोल इंडिया लिमिटेड औंदी सहायक कंपनियों ते सिंगरेनी कोलियरीज कंपनी लिमिटेड दे 2 लक्ख शा मते गैर कार्यकारी कर्मचारियें गी लाहू होग। मंत्रालय नै एहू बी दस्सेआ जे एहू राशि उपस्थिति दे आधार अनुपालिक आधार पर जमा कीती जाग। मंत्रालय नै अगगे दस्सेआ जे पीएलआर दा मकसद सीआईएल दे गैर कार्यकारी कर्मचारियें दे योगदान गी मान्यता देना ते त्यौहारें दे मौसम च उनेंगी राहत प्रदान करना ऐ।

<><><><><><>

Palistine Prez Hamas

फिलीस्तीन दे राष्ट्रपति महमूद अब्बास होरें हमास दी आलोचना कीती ऐ। उनें संयुक्त राष्ट्र दे समर्थन आहली शांति योजना पर अमरीका दे राष्ट्रपति डोनल्ड ट्रम्प कन्नै रलियै कम्म करने दी इच्छा व्यक्त कीती। संयुक्त राष्ट्र महासभा च शामिल होने थमां रोके जाने दे बाद वीडियो राएं श्री अब्बास होरें सरबन्धित भूमि पर फिलीस्तीन दा दावा दोहराया। उनें आखेआ जे ओहू अमरीका, फ्रांस ते साउदी अरब कन्नै सहयोग लेई तैयार ना। श्री अब्बास होरें इज्राइल गी फिलीस्तीन दी भूमि पर कब्जा नेई करने दी चेतावनी दिती कीजे इस करी संयुक्त राष्ट्र दे समर्थन कन्नै द्विराष्ट्र समाधान खतरे च पेई सकदा ऐ। अमरीकी राष्ट्रपति होरें आखेआ जे ओहू इज्राइल गी फिलीस्तीनी क्षेत्रें पर कब्जा नेई करने देडन, मगरा उनें द्विराष्ट्र समाधान या फिलीस्तीन गी मानता देने दा समर्थन नेई कीता।

<><><><><><>

Asia Cup Cricket

एशिया कप टी-20 क्रिकेट दे सुपर-4 मुकाबले च भारत दा मुकाबला अज्ज श्रीलंका कन्नै होग। एहू मैच संज्ञा 8 बजे कोला दुबई इंटरनेशनल स्टेडियम च खेड्डेआ जाग। उआं भारत पैहले गै फाइनल च पुज्जी गेदा ऐ जिसलै के श्रीलंका दी टीम इस प्रतियोगिता थमां बाहर होई गेई ऐ। हून फाइनल च भारत ते पाकिस्तान आमने-सामने

होडन। एह मैच ऐतवारें खेड्ढेआ जाग। जंदी रातीं पाकिस्तान नै बंगलादेश गी 11 रन्जें कन्नै हराइयै फाइनल च अपनी थाहर पक्की कीती ही।

<><><><><><>

Para Archery

दक्खन कोरिया दे Gwangju च चला रदी पैरा तीर-अंदाजी दी विश्व प्रतियोगिता च भारत दे घट्ट शा घट्ट त्रै तगमें जीतना तय होई गया ऐ कीजे तीर अंदाजें Compound Open वर्ग च सुन्ने दे तगमे दे मुकाबले च अपनी थाहर पक्की करी लेई ऐ। जम्मू-कश्मीर थमां पैरा ओलम्पिक च कैह दा तगमा हासल करने आहले राकेश कुमार ते तोमन कुमार दवै मर्दे दी Compound Open व्यक्तिगत मुकाबले च सुन्ने दा तगमा हासल करने लेई मैच खेडगंन। जम्मू-कश्मीर दी 18 बरे दी शीतल देवी नै ब्रिटेन दी खडारी गी 145-140 कन्नै हराइयै महिला फाइनल च प्रवेश करी लैता ऐ। हूंन उन्दा मकाबका तुर्की दी खडारन कन्नै होग।

<><><><><><>